

Noticia
Transparente
di Gobierno

ISLA ONLINE

Diabierna 19 Januari 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



Gabinete Wever-Croes



CACIQUE MACUARIMA SCHOOL CU HOPI INTERES DEN E CELEBRACION DI DIA DI BETICO



Siguiendo cu su bishitanan na scolnan basico, diabierna 19 di januari, Prome Minister Evelyn Wever-Croes a pasa cerca e alumnonan di Cacique Macuarima School klas 5.

E muchanan di e dos klasnan 5 tawata masha contento y cu hopi interes pa celebra Dia di Betico. Den un ambiente masha ameno, Prome Minister a combersa cu nan y a conta nan un tiki di e lucha y logronan di Betico. Aki e muchanan a muestra nan curiosidad y a haci basta pregunta hopi interesante. Tawata momentonan masha agradabel unda e mandatario a tuma opinion di e muchanan riba kico nan lo kier pa inverti den dje.

Prome Minister, desde cu el a drenta Gobierno el a pone enfasis riba e importancia di e fecha 25 di Januari, Dia di Betico, cu esaki no ta solamente un dia liber di scol, sino pa splica e muchanan e significado di e dia aki. Esaki ta e motibo principal di tur su esfuersonan pa sigui bishita scolnan, pa combersa cu e muchanan, conta nan e historia di su omo y padrino Betico, y tambe pa e mes wak con nan ta preparando

pa e dia importante aki.

Tur bishita na scolnan ta sigui impresiona Prome Minsiter, e poesianan, presentacionnan y tur e interes cu e muchanan ta muestra a traves di storianan cu nan ta conta nos mandatario. “Nos tur por traha hunto pa hiba nos Pais dilanti, nos tur tin un Betico den nos”, Prome Minister a expresa.

“Nos ta sigui bishita mas scol prome cu Dia di Betico y tambe ora di dia di Himno y Bandera. Asina nos lo sigui otro aña atrobe pasobra pa mi ta hopi importante pa ta aki nan mi mes, pa mira kico e muchanan ta pensa di un persona asina importante manera Betico Croes.”

Reconociendo e gran trabou di cabesante y staff di Cacique Macuarima School, Prome Minister a despidi gradeciendo nan pa a permiti su persona bishita nan un biaha mas y bisando cu semper e scol lo tin un luga special den su curason. ■





MINISTER

Ursell Arends

PROYECTO DI AGRICULTURA NA SCOLNAN BASICO A CUMINSA



Ministerio di Naturalesa ta orguyoso di por inicia e proyecto di agroforesteria sintropico na scolnan basico. Na 13 scol rond di Aruba lo instala un hardin di alimentacion unda cu muchanan di eerste te cu zesde lo siña planta, cuida y cosecha diferente tipo di matanan.

E proyecto aki, cu ta un esfuerzo entre Santa Rosa, Living Soil Aruba y Ministerio di Naturalesa, lo cuminsa diasabra 20 di januari na Scol Basico Washington 7'or di mainta te cu 1'or di merdia. Cada scol lo haya un workshop for di Living Soil prome, mientras cu Santa Rosa ta prepara e espacio, ekipo y material di antemano. Ora cu esaki nan ta cla lo planta diferente mata di berdura y fruta cu ayudo di e scolnan y boluntarionan.

E meta di e proyecto aki ta pa brinda nos hobennan herment cu lo yuda nan den futuro y na su turno fortalece nos sector

primario. Muchanan lo siña tocante di alimentacion y agricultura sostenibel. Tambe e hecho cu nan lo ta educando nan mes pafo di klas haciendo uzo di nan mannan cual ta algo sumamente balioso pa nan desaroyo.

Nos hobennan ta e futuro di nos isla cual ta un factor cu Ministerio di Naturalesa ta enfoca ariba dje. Pues un bon educacion pa nos hobennan den e area agricola lo sa di yuda nos isla desaroya un pilar economico adicional.

Minister Arends ta haci un yamado na pueblo di Aruba pa duna nan aporte. Un y tur ta bon bini pa yuda e scolnan traha nan hardin di alimentacion. Cu apoyo di nos comunidad nos por brinda nos muchanan un bunita proyecto cu lo sa di brinda nan oportunidadnan den futuro.



MINISTER MADURO DI FINANSA A HAYA UN PRESENTACION DI AZV SU MODELO PA PRONOSTICA E CUADRO FINANCIERO MULTI-ANUAL DI E FONDO DI SEGURO MEDICO DI ARUBA

**E modelo ta midi, entre otro, e riesgo di e fondo di AZV
pa presupuesto di Pais Aruba**



E siman aki Minister Maduro di Finansa a reuni cu e director y ehecutivonan di AZV pa asina por haya un presentacion di AZV su modelo pa pronostica e cuadro financiero multi-anual di e fondo di seguro medico di Aruba. E modelo aki pa pronostica e riesgonan financiero di AZV, ta uno importante pa e maneho presupuestario di nos Pais, ya cu e modelo ta midi, entre otro, e riesgo di e fondo di AZV pa presupuesto di Pais Aruba.

Conforme e Ley di AZV, si e fondo di AZV conoce deficit, e ora Gobierno tin un obligacion pa presupuesta e fondonan necesario y cera e buraco financiero aki via un 'landsbijdrage' cu ta wordo duna na AZV. E ultimo añanan aki AZV a hiba un control di gasto y hunto cu e entrada genera pa BAZV, e fondo di seguro medico di Aruba a wordo fortifica y ta pone cu Gobierno no mester a hinca fondo den AZV via un 'landsbijdrage'.

E fondo di AZV ta stabil, sinembargo tin factornan manera e costo di remedi, costo di dunado di cuido medico, 'vergrijzing' di nos populacion, inversionnan necesario den cuido na Aruba,

cu ta forma un riesgo financiero pa e fondo di AZV. E modelo cu expertonan paden y pafo di AZV a diseña, ta proyecta e risiconan aki pa e añanan nos dilanti y ta brinda un bon 'tool' pa guia e desicionnan necesario pa asina e fondo medico di AZV por keda stabil sin cu Gobierno mester pone placa aden via un 'landsbijdrage'.

Minister Maduro a expresa di ta contento cu e modelo aki di AZV, ya cu e ta pas den e trabounan cu ta wordo haci pa presenta den Presupuesto 2024 y siguiente presupuestonan di Pais Aruba, un bista di e risiconan financiero cu por tin efecto riba e presupuesto di e aña coriente en particular y Aruba su finansa publico en general.

Proximanente Minister Dangui Oduber hunto cu AZV lo presenta e modelo aki na Consejo di Minister, Parlamento di Aruba y Pueblo en general.

MINISTER MADURO DI FINANSA A REUNI CU EXPERTO DI ADUANA HULANDES SR. JAN KAMP KENDE LO BAY BRINDA ASISTENCIA TECNICO NA E TEAM DI MANEHO DI ADUANA NA ARUBA



Recientemente Minister Maduro a haya confirmacion di e Director General encarga cu Aduana na Hulanda, sra. Nanette Schelven, cu Aduana Hulandes lo yuda Aduana Aruba cu asistencia tecnico pa fortifica y profesionalisa Aduana di Aruba. E asistencia ta wordo brinda dentro di e programa di 'Versterking Grenstoezicht' y sr. Jan Kamp kende ta un experto di Aduana Hulandes cu experiencia amplio a keda asigna pa brinda e asistencia necesario na e team di maneho di Aduana na Aruba.

Sr. Kamp ta un Aduanero Hulandes cu recientemente a hubila, pero cu a keda traha riba proyectonan pa Aduana Hulandes. Como Aduanero, sr. Kamp tabata na cabes di Aduana na Schiphol y tambe a lidera e Cuerpo di Aduana na e waf di Rotterdam. Den añanan 90 sr. Kamp a traha pa un par di aña tambe na Aruba y pesey ta conoci cu nos isla y Aduana di Aruba caba.

Dialuna cu a pasa Minister Maduro a reuni cu sr. Kamp pa asina repasa e necesidad cu tin na Aduana y tambe pa repasa e trabounan cu e mandatario lo kier mira realisa na Aduana

Aruba a corto y mediano plazo. Puntonan cu a bin dilanti den e reunion ta, entre otro, e ley di ALDA cu mester keda introduci a corto plazo pa asina modernisa e trabounan na Aduana. E edificio nobo di Aduana cu tambe mester keda cla mas pronto cu ta posibel. Banda di esaki a toca e necesidad pa Aduana por conoce e formacion, ekipo y profesionalismo necesario pa por traha na un manera mas eficiente pa por atende cu e retonan cu e Aduana di un isla manera Aruba ta confronta y mester surpasa.

Den e dos prome simannan di januari ya caba sr. Kamp a cuminsa hiba e combersacionnan necesario cu diferente persona den Aduana pa asina por haya un bista y compila un lista di e retonan cu Aduana tin, pa despues por traha un plan di mehoracion pa wordo ehecuta a corto y mediano plazo pa fortifica y profesionalisa e organisacion di Aduana na Aruba.

Minister Maduro ta gradici sr. Kamp pa a acepta e reto pa brinda asistencia na e team di maneho di Aduana na Aruba, y ta mira dilanti riba un bon cooperacion na bienestar di e Cuerpo di Aduana y di Aruba. ■



MINISTER ENDY CROES A ATENDE E CEREMONIA DI APERTURA DI E PROME TAYER DI ANTI-DOPING EDUCATOR INSTRUCTOR TRAINING DI REGION



Siman pasa, a tuma luga e prome tayer di Anti-Doping Educator Instructors Training di region. E seminario aki a tuma luga na Aruba, unda cu 11 pais a participa. E tayer tabata un colaboracion entre Caribbean Regional Anti-Doping Organization (RADO), Comité Olimpico Arubano (COA) y Comisión Anti-Doping di Aruba. Sigur por mira atras riba un training fructifero. E facilitadonan di United Kingdom Anti-Doping (UKAD), United States Anti-Doping Agency (USADA) y Caribbean RADO a brinda e training aki na e participantenan. Despues di cada sesion a dialoga riba e plan strategico di ambos organización durante e ultimo añanan. E meta di training aki ta pa train e personanan cu ya caba tin experiencia riba tereno di anti-doping, pa nan bira Anti-Doping Trainers cual na nan turno lo educa otro personanan pa bira educadonan di anti-doping. Pa asina aki, cada pais por logra establece un programa estructural di educacion di anti-doping. Minister Endy Croes tabata presente na apertura di e tayer aki. E tayer ta di vital importancia, ya cu 2024 ta aña olimpico y nos kier pa nos atletanan ta bon prepara, educa y ta consciente di e peligrosnan di doping. Tambe, e aña aki WADO lo haci evaluacion si tur pais ta cumpli cu e rekisitonan di e World Anti-Doping Code Compliance 2024, di cual educacion di anti-doping tin e prioridad mas halto riba e lista hunto cu e test di anti-doping.

UKAD National Trainer, Sra. Wendy Henderson, a indica cu e “partnership” cu Caribbean RADO ta uno valioso. E tayer di “train the trainer” a brinda oportunidad pa trece hunto



educadonan di “clean sport” di region Caribe. Cu sosten di UKAD a desaroya tecnicanan pa instrui, como tambe habilidad pa train y mentor pa asina prepara mas educado anti-doping den nos region. E conocimiento, experticio y disponibilidad pa siña a produci hopi manera placentero y creativo pa educa atleta riba tema di anti-doping. USADA Director of Elite Education, Sra. Tammy Hanson, a expresa di ta sumamente impresionada cu e interes di e participantenan pa siña, amplia nan programa di educacion y pa duna educacion y train e siguiente generacion di educadonan.

Pa conclui, Minister Endy Croes ta felicita Caribbean Regional Anti-Doping Organization (RADO), Comité Olimpico Arubano (COA) y Comisión Anti-Doping di Aruba cu un tayer exitoso! Pabien na e 11 instructornan di anti-doping cu a finalisa e tayer cu exito! ■■■



Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD